

**PEMBERITAHUAN PERTANYAAN BERTULIS DEWAN RAKYAT  
MESYUARAT KEDUA, PENGGAL KEEMPAT  
PARLIMEN KEEMPAT BELAS**

---

**PERTANYAAN : BERTULIS**

**DARIPADA : YB DATO' WIRA HAJI MOHD. ANUAR BIN  
MOHD. TAHIR (TEMERLOH)**

**SOALAN**

**DATO' WIRA HAJI MOHD. ANUAR BIN MOHD. TAHIR [ TEMERLOH ]** minta **MENTERI KANAN KERJA RAYA** menyatakan tindakan yang diambil untuk menambah baik prestasi pembinaan dan penyeliaan kerja-kerja berkaitan geoteknik. Laporan audit terbaru telah melaporkan kualiti pembinaan jalan baharu di Kompleks Petroleum Bersepadu Pengerang (PIPC) telah berlaku pemendapan di bahagian '*road embankment*', lokasi sambungan antara jambatan dengan '*road embankment*' dan sambungan antara struktur '*pile embankment*' dengan '*road embankment*'. Pemendapan dalam bentuk '*differential settlement*' dikesan pada kedua-dua lokasi sambungan tersebut menyebabkan permukaan jalan beralun.

**JAWAPAN**

Tuan Yang Di-Pertua,

Untuk makluman Ahli Yang Berhormat, berdasarkan kepada Laporan Geoteknikal, kawasan Projek Pembinaan Rangkaian Jalan Di Kompleks Bersepadu (PIPC) Pengerang terletak di kawasan rendah dan jenis tanah adalah tanah gambut dan tanah liat lembut dengan ketebalan yang berbeza-beza di antara 15 meter hingga 30 meter. Keadaan muka bentuk bumi dan jenis tanah menyebabkan kadar pemendapan di kawasan tersebut adalah tinggi. Tanah akan mengalami mendapan secara semula jadi melalui proses pengukuhan tanah disebabkan beban trafik dan beban tambahan selepas jalan dibuka dan menyebabkan jalan menjadi beralun.

Jabatan Kerja Raya telah membaiki mendapan tersebut dengan menggunakan kaedah *Polyurethane Injection* (PU) bagi menstabilkan/mengurangkan mendapan yang berterusan di antara tanah tambak dan struktur. Kerja-kerja pembaikan tersebut telah siap pada 30 Disember 2020. Pemantauan secara berterusan dan kerja-kerja penyelenggaraan oleh pihak kontraktor dilaksanakan secara berkala.

Sekian, terima kasih.

**PEMBERITAHUAN PERTANYAAN BUKAN LISAN  
DEWAN RAKYAT, MESYUARAT KEDUA,  
PENGAL KEEMPAT, PARLIMEN KEEMPAT BELAS**

**PERTANYAAN : BUKAN LISAN**

**DARIPADA : DATUK MOHD AZIS BIN JAMMAN  
[ SEPANGGAR ]**

**SOALAN**

minta **MENTERI PEMBANGUNAN USAHAWAN DAN KOPERASI** menyatakan jumlah peserta dan pembiayaan yang diberikan kepada Perusahaan Mikro, Kecil dan Sederhana (PMKS) di Sabah sepanjang tempoh pandemik COVID-19, bantuan-bantuan yang diberikan serta peruntukan yang disediakan bagi tempoh RMKe-12.

**JAWAPAN**

1. Untuk makluman Yang Berhormat, Kementerian Pembangunan Usahawan dan Koperasi (MEDAC) sentiasa komited dalam usaha mengukuhkan Perusahaan Mikro, Kecil dan Sederhana (PMKS) yang merupakan enjin ekonomi yang penting dalam menyumbang kepada pertumbuhan ekonomi di Sabah. Daripada keseluruhan 1.15 juta PMKS di Malaysia, terdapat sebanyak 80,000 atau 7% PMKS yang sedang beroperasi di Sabah.

2. Khusus bagi negeri Sabah, sejak tahun 2020 sehingga Oktober 2021, MEDAC melalui agensi-agensi di bawahnya telah menyediakan pembiayaan seperti berikut:

- (i) **TEKUN Nasional** dengan pembiayaan kepada seramai 8,342 PMKS, melibatkan jumlah yang disalurkan sebanyak RM123.7 juta;

- (ii) **SME Bank** telah meluluskan pembiayaan kepada 399 PKS di negeri Sabah, melibatkan jumlah keseluruhan pembiayaan bernilai RM287.5 juta;
- (iii) **Perbadanan Nasional Berhad (PERNAS)** menyediakan kemudahan pembiayaan kepada usahawan yang menceburkan diri dalam sektor francais iaitu sebanyak 9 permohonan telah diluluskan melibatkan usahawan francais di negeri Sabah dengan jumlah pembiayaan sebanyak RM2.62 juta; dan
- (iv) **Bank Rakyat** telah menyalurkan pembiayaan kepada seramai 584 usahawan PMKS di Sabah dengan jumlah sebanyak RM75.38 juta.

3. Dalam tempoh RMKe-12, MEDAC akan terus komited dalam usaha melonjakkan pertumbuhan PMKS melalui pelaksanaan pelbagai strategi dan inisiatif. Bagi tahun 2022, MEDAC telah diluluskan peruntukan pembangunan sebanyak RM355.83 juta yang akan dimanfaatkan untuk menyokong agenda pembangunan keusahawanan negara yang inklusif, seimbang dan mapan.

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT KEDUA, PENGGAL KEEMPAT,  
PARLIMEN KEEMPAT BELAS**

---

**PERTANYAAN : BUKAN LISAN**

**DARIPADA : YB DATUK MOHD. AZIS BIN JAMMAN  
[SEPANGGAR]**

**SOALAN**

**DATUK MOHD. AZIS BIN JAMMAN [SEPANGGAR] minta MENTERI PELANCONGAN, SENI DAN BUDAYA menyatakan bantuan yang diberikan kepada pengusaha pelancongan dan kebudayaan di Sabah sepanjang tempoh pandemik COVID-19.**

**JAWAPAN**

**Tuan Yang di-Pertua,**

1. Sepertimana Ahli Yang Berhormat sedia maklum, Kerajaan telah melancarkan beberapa pakej rangsangan ekonomi seperti PEMULIH, PEMERKASA Plus dan PEMERKASA yang bertujuan untuk memulihkan ekonomi dan memastikan kesinambungan perniagaan sambil mengekalkan pekerjaan, terutamanya rakyat Malaysia.

2. Antara bantuan khas yang diberikan kepada penggiat industri pelancongan yang disalurkan terus melalui Kementerian Pelancongan, Seni dan Budaya (MOTAC) adalah:

- (i) Bantuan khas tunai kepada agensi pelancongan yang berdaftar dengan MOTAC termasuk syarikat-syarikat MM2H yang mempunyai lesen *inbound* di bawah MOTAC;
- (ii) Bantuan kewangan kepada pemandu pelancong di seluruh negara;
- (iii) Bantuan khas tunai kepada pengendali inap desa di bawah Program Pengalaman Homestay Malaysia (MOTAC); dan
- (iv) Bantuan Kewangan Geran Khas Prihatin kepada pengusaha spa dan pusat urutan kaki berdaftar dengan MOTAC;

3. Untuk makluman Ahli Yang Berhormat jua, mekanisma pemberian bantuan tunai ini adalah bayaran secara *Electronic Fund Transfer* yang diuruskan sendiri oleh Kementerian terus kepada akaun penerima. Sejak bulan April tahun 2020, Kementerian ini giat melaksanakan proses penyaluran kepada penerima dalam usaha memastikan semua pihak yang terkesan dan layak mendapat bantuan yang sewajarnya sebaik sahaja setiap pakej bantuan diumumkan oleh Kerajaan.

4. MOTAC turut menyediakan bantuan dalam bentuk kewangan kepada Badan Bukan Kerajaan Kebudayaan untuk mengadakan program seni, budaya dan warisan. Bagi tahun 2021, sejumlah RM3juta telah diperuntukkan bagi tujuan tersebut dalam usaha MOTAC membantu kelestarian penggiat seni, warisan dan budaya terutamanya ketika berdepan dengan penularan COVID-19.

5. Selain itu, MOTAC juga telah mewujudkan insentif bagi membantu penggiat industri pelancongan untuk terus mampan walaupun terkesan teruk akibat daripada pandemik COVID-19. Insentif yang ditawarkan tersebut adalah melalui pembiayaan kewangan seperti Skim Infrastruktur Pelancongan (SIP) dan Tabung Khas Pelancongan (TKP).

6. MOTAC turut menyediakan bantuan bukan kewangan kepada penggiat industri pelancongan yang terjejas, antaranya:

- (i) Kelonggaran Berkaitan Kompaun;
- (ii) Pengecualian Fi Kepada Pengusaha Pelancongan dan Pemandu Pelancong; dan
- (iii) Kelonggaran Syarat Lesen Kepada Pengusaha Pelancongan.

7. Selain daripada bantuan Kerajaan yang disalurkan peruntukannya melalui MOTAC, terdapat juga insentif lain yang khusus untuk penggiat industri pelancongan serta juga bantuan Kerajaan yang disalurkan rentas kementerian lain yang boleh turut dimanfaatkan oleh penggiat industri pelancongan. Antaranya ialah:

- (i) Diskaun bil elektrik 10% kepada pengusaha hotel, pengendali taman tema, pusat konvensyen, pusat membeli-belah dan pengusaha pelancongan;
- (ii) Pengecualian cukai pelancongan dan cukai perkhidmatan oleh pengusaha hotel;

**NO. SOALAN : 251**

- (iii) Penangguhan pembayaran ansuran cukai pendapatan bulanan oleh syarikat; dan
- (iv) Sokongan kepada majikan menerusi Program Subsidi Upah iaitu kadar bantuan sebanyak RM600 setiap pekerja selama empat (4) bulan dan terhad sehingga 500 pekerja setiap majikan.

8. Usaha untuk membantu penggiat industri pelancongan untuk kembali bangkit akan diteruskan pada tahun 2022, dengan Pelan Pemulihan Pelancongan yang turut meliputi bantuan khas tunai, geran sepadan untuk pembaikan Hotel Bajet serta Homestay berdaftar dengan MOTAC serta geran sepadan untuk penganjuran program atau acara pelancongan, seni dan budaya.

Sekian, terima kasih.